

Auflegung Gemeiner

Solem orientem quā occidentem. Es betē
mehr leut die Sonnen an weñ sie auffgeht/
den wenn sie vndergeht/als wolt er sagen/
Man ist den jügen fürsten allwege hōlder
denn den alten. Hebe ich was an/so ist mir
nit leyd für der leute zufall/ich weyß mann
wirt mir günstiger sein denn Pompeio. Ich
gehe auff/er geht vnder/ich bin im steigen/
er ist im fallen/vñ wie er sagt/also ergieng
es auch. Es ist auch war/das mann sagt/
Jung schön genug.

681

Wer kan allzeit seiden spinnen.

Hiemit entschuldigt man die / so vnder
weilen irren / oder mit Worten vñ wercken
also gebaren/dz es nit fast löblich ist. Quis
omnibus horis sapit? Bonus aliquādo dor
mitat Homerus. Wer kans allzeit so eben
bedencken? Wer kan allzeit seiden spinnen?
Seiden ist weych vñ zart / wer die spinnen
sol/der muß hübschlich mit vmbgehn/ daß
ers nit verderbe/vnd nichts vergesse. Also
spinnet seiden/wer auff alle seine rede weiß
lich acht hat/bedēckt mit vernüfft/ was er
reden/thun/vnd lassen soll. Herwiderumb
wer sich nicht allweg fürsicht in reden/vnd
wircken/der spinnt nit seiden/ sonder grob
sackgarn.